

تمازيغت إقت سي تركيزن زاير

د. أحمد نوح

جامعة مولود معمري، تيزي وزو

زاير دقت سي طموران تفرقت أوقافا إسقارن تموزغا، أوتن إزوران -س
أمزروي- تاريخ ندونيت. أسو طمورتغ يلا يدجور أوال ف تمازيغت د مانش أد
ت- نسيثف تمنداوت-دستور أجديد. أون تفرت تقزولت أد سيولغ بسي ف
وزال تمازيغت سوا تغرما د أمزروي سوا توتلايت، دونشانس دي د تمدورت
نزاير نواسو.

تاغرما تمازيغت

بنادم أمزوار إتواسنن طمورت ن تفرقت أوقافا يلا غرس ما دروس
9.000 نسقاسن أمنش إد-سشنن إموسناون نالآثار (حمداوي، الحضارة
المازيغية، ت. 29، شفيق، ثلاثة...ت. 19). هيرودوت Herodotos إيدر
إمازيغن 6 نلقرون قبل تلاليت نسيدينا عيسى. دفر وامن رومان د إفينيقين سي
إدوسين سمانا-سن إ يمازيغن، "إفريقين"، توغن توزونن غل شارد 3 تقبيلين:
إيبين، د إمورين، د إينوميدين. أمنش إ سن -سمان إرومانين "البربر" إيبنت

سيسن أعرابن، لمعناس ولان اول فهمن أوال-س، إمازيغن دغنتنين تسهان ولان اول إفهم توتلايتن-سن "إكناون". أموسنا أزياري ابن خلدون يج-د إقن وضليس دامقران فتقبيلين د تجلديوين ن إمازيغن (شفيق، ثلاثة...ت. 8 دوايني إ دتبعن).

تغرمان إمازيغن دامقرانت تنجم اتقيم تيوضانغ-د أليهارو، مع وامو يغلب ن إعداون إد-أوتفن طمعن طمورانسن: أوسين-د سقت طارا جار أجليد لارباس د تجليدت ديدون، يتواسشا أغرم ن قرطاج أسقاس ن 816 ق.ت.س.ع. يونانين د إرومانين أوتفن-د سي لقرن فايد 5 ق.ت.س.ع. غل طمورت ن تفریقت أوقافا، بدن إمازيغن أودم-نسن، أشرن إمنغان د زعلاك جاراسن د إقرطاجيين إمازيغن (شفيق، ثلاثة...ت. 14). سي لقرن فايد شارد 3 ق.ت.س.ع. فغن-د إجلیدن دامقرانن أند سيفاكس، ماسينيسا، يوغورتن، بدن دسات إعداون. سي إوتفن إمازيغن لسلام سشان اوجار ن 20 ن تجلديوين تمسلمين (شفيق، ثلاثة...ت. 59).

تغرما تمازيغت تواسن دي ايولو إندونن، أنبدر دي لمثل برك: لبنيان إديمين أليهارو لهرامات إلان دي مناو إموشان ن تفریقت أوقافا أن إمدغاسن دي باتنة، وتييازة د تيهرت، د دوكة دي تونس، د سيدي سليبان دي لمروك...؛ دخ إغرمان إتواسنن طمورت ن مزاب د لوراس دلروك. تواسنن إمازيغن دخ لفلاحت د تکرزا سي بکري نجمن أدسلفان تاويلات نوخدام نظمورت، بلا ما انسيول س لفن دوايني إقن غرس. أوغلب نموسناون إتوشو طمورت ن تموزغا إدونيت

دي أيولو إندونن أن دين د تفلسفيت د توسنا سيسن ابن رشد (1126-1198 م) إسرسن تركزين ن تفلسفيت دونيت، د ابن أجروم الصنهاجي (1273-1323 م) إيورين الأجرومية ن توتلايت تعرايت، د عباس ابن فرناس (810-887) أموسناو إد إسلغان يغلب ن إدشرا رياضيات ولفزيا يجو لمحاولات تمزوارت نوفرفر، د ابن منظور الإفريقي (1232 م) إيورين إقن لقاموس ن تعرايت، د ابن بطوطة اللواتي (1304-1377 م) إقن سي إرحالن إمزوار إنضن يغلب ن طمورا ن دونيت.... (حمداوي، الحضارة الامازيغية، ت. 7 دوايني إدتبعن).

زاير تمازيغت

إزايرن أيولون د إمازيغن س تاريخ د لنتربولوجيا ولعادات د تقاليد د طمورت، لمبصح د روس إنني إدقيمن زديغ ساوالنت (الأمازيغوفونيون). أديقم إمارو اد نسستن د بت د تمازيغت؟ د توتلايت إقت نغ د توتلايين مخالافانت؟ رقبن اموسناون بلي تمازيغت توغ د توتلايت إقت (تالبييت تكبورت)، لمبصح دفر لقرون توزون غل توتلايين مخالافنت جار بسي د يغلب، سبت نمناوت تعاوسوين، إمازيغن أول جين عمرو دولت إقت تجروتن، دخ لجغرافيت نظموتنس تاوساعت تزون جاراسن، يغلب ن تقبيلين رولنت غل إيورين د سحاري قيمن تعاشان جارسن د لقرون لعزلت. قاع أمن أد ناف أون توتلايين مشاراكنت دي تجرومت د يغلب ن إوالن.

بت توتلايت دقن نسق نلاشارات يومسفهام جار ميدن، انجم انيني بلي لان

توتلايين مخالفت ن تمازيغت مادام ميدن إتن-تساوالن أول تمسفهامن جراسن دي كلش. ازيجك انسوجم ابراس اغن-بيني منشت ن توتلايين ن تمازيغت طمورتغ ن أنجم أد نيني لانت سا 7 نتوتلايين أند:

- **تاقبايليت دي طمورت ن لقبائل، تجرو مناو إوالن تمخالفن جار بسي ديغلب أن بجاي، تيزي وزو، تشي د اوقاس، أسطيف د قنرات، د تزديموحت نوغرم تيزي وزو.**

- **تساويت دي طمورت ن لوراس، تجرو إوالن ن سنت تقبيلين تمقرانين ن إنموشين د إحركاتيين، دي سز 6 نولايات، أن إوالن ن تكوت د خنشلت، د مروانة، د أمشونش د سوق اهراس د تبست.**

- **تومزابت دي طمورت ن مزاب تجرو إوالن ن سا 7 ن إغرمان نيغزر ن مزاب لولايت ن تغردايت. أنجم أنرفي غرسن أول ن تفرقرنت ن وارجلان إلان إقرب أمش غل تومزابت.**

- **تاتارقيت نغ تاماشغت إلان توساوال تنري ن زاير دي طاسيلي ن أهقار د طاسيلي ن أزجر، لولايات ن إليزي د تمنغاست د أدرار.**

- **تاشنويت نغ تاقبايليت ن تيبازا، تجرو إوالن ن تيبازة (تيفزا) د شرشال د قورايا ، د إموشان إس-د يزين. أد نجم أد-س نرفي أوال ن إويرين ن لوراسنيس د ظهert، إد-أوسين لولايات ن لبلدت د تيسمسيلت د عين الدفلي.**

- **تشلحيت إتوساوالن دي تما تغربيت دي لولايت ن لبيض (بوسمغون) د نعامة (أسيل) د سعيدة.**

- تزنايت إتوساوالن لولايت ن أدرار.

جار أون سان توتلايين غي تاقيبليت تواجن غفس يغلب ن إبراسن تدول-
د توسعزام ليكولات د تسداويين. أسو لان د لولوفات ن ولان يفغ-د س
تسداويين دي توتلايت د يضلس د تغرما تمازيغيت، لكثرت-نسن دي تمان
لقبايل د لوراس. أمو يسشنا-د لفرق أزعلوك إلان جار أون توتلايين أندون ن
وبراس أكاديمي.

تمازيغت دي تمنداوت ن طمورتغ

تمسالت ن تمازيغت د وئشان-س دولت تزايريت يلا غفس أوال إ تثلت
تمزوات أسقاس ن 1949 أماس نوكابار ن شعب إشاتن ف لستقلال، دفر وامن
إزايرين لهان أجاهد إوسوفغ ن وعداوا فرنسي. لمبصح إمغناسن ن تمازيغت قيمن
خدمن توتلايت-سن دي زايرنغ طمورت ن لغربت سي وقدان لقرن فايد 19،
سوفوس ن عمار اوسعيد بوليفة د بن اسديرة، يوسد دفرن-سن اجدن فايد سن ن
لقرن 20 مولود معمري داغلب ن اموسناون اس-د-رين انشانس إ تمازيغت
(شاكرا، ئمازيغن أسأ، ت. 24 دوايني إ دبغن). أسقاس ن 1995 تقبل دولت
تزايريت تمازيغت د تركيزت ن تنشيت تزايريت، ماني يتوسلفا-د "اسقامو اونيق
ن تموزغا". دفر وامن أسقاس ن 2002 توسيتف تمازيغت د توتلايت تغلناوت
تمنداوت نظمورتغ إيديس ن لسلام د تعرايت، آل اسقاس ن 2016 سي تستعرف
تمنداوت س تمازيغت د توتلايت ترسميت نظمورتغ.

تمازيغت د لسلام د تعرايت دي تمنداوت د شاردت تركيزين ن تنشيت
 نظمورت ن زاير لان تقننت توات جار ازايرين. اموني يوس-د دفر اقرن
 اوعافر د نضال د ازجرار بشاك زاير اتمصالح د ييبان-س. تنقيط فايت 4
 نتمنداوت ن ييارو تقار >> تمازيغت نتاها دخت د توتلايت تغلناوت د ترسميت
 << . لمبصح تنقيط فايت 212 ن تمنداوت اعنان تركيزين ن دولت لان
 ولتوبديلنت عمرو ولتسيول ف تمازيغت، سوامو اوعلب ن اموسناون ن وزرف
 سوترن اد اس-تواج لهمايت ا تمازيغت. ييوس-د امار استواوش ا تمازيغت د
 توتلايت تغلناوت ترسميت ضمان بلي اولتوبديل عمرو دي تمنداوت ان نتاها ان
 تركيزين تيفيضنتين ن دولت ترايريت: لسلام د تعرايت. امغار تمازيغت تلا دقن
 شرا اتقنن جار ازايرين ماني لان، سوا س توتلايت، سوا سومزروي د تاريخ
 ،سوا سلعادات د يضلس.

اقيم-د ابريد د ازجرار يوسجمو ن تمازيغت دي ايولو توتلايين لان ديس س
 اوضهلان دولت ديسنت بشاك اول نضيت، د ورزام ن وبريد ن وبراس غفست
 دي تسداوين، د اوسعزم-نست اطاروا ن زاير، د اوسع ن اوسخدم-نست دي
 ايولو اندونن ن تمدورت ايديس ن تعرايت. بشاك اد تعاد تمازيغت د شرا لان
 اجرو ايولو ازايرين د اواتن د فوس اقرن اوسشان زاير تجديت.

تيغوبلا

د. جمال حمداوي، معالم الحضارة الامازيغية، مكتبة نور، 2019.

د.العربي عقون، الأمازيغ عبر التاريخ، نظرة موجزة في الأصول والهوية،
التنوخي للطباعة والنشر والتوزيع، الرباط، المملكة المغربية، الطبعة الاولى،
2010.

محمد شفيق، ثلاثة وثلاثون قرنا من تاريخ الأمازيغيين، جمعية البحث والتبادل
الثقافي الامازيغية، الرباط، 1989.

د.سالم شاكر، ترجمة عبد الله زارو، يمازيغن أسا - الأمازيغيون اليوم،
1990.

